

姜先生全集



姜先生全集



湛園未定稿卷六

全集六

邑後學

馮保燮

重編

王定祥

序下

贈翁祭酒遷少詹事序

記曰行一事而三善備者惟世子而已其齒於學之
謂也古者大司成教世子及士以舞干戚語說命乞
言皆大樂正授之以篇章之數然後大司成坐於東
序而論說之是凡教大樂正徒授數而不論說論說
者大司成也然大司成之職在論說猶不離於口耳

之功先王之教世子以爲口耳之功未足以成德而尊教也於是乎立之太傅少傅以養之於父子君臣之道然後可以潛移默化其志氣使之馴習於善而不自知故曰太傅審父子君臣之道以示之少傅奉世子以觀太傅之德行而審喻之此其序也又曰樂正司業父師司成司成就德行尊爲父師則必不僅主論說責效於口耳之間可知也夫其能博喻然後能爲師彼爲之太傅少傅者又豈與夫樸魯少學者泛而論父子君臣之道如木偶之拜起然哉故愚以爲兩傅之職非司成樂正其人莫足當之古者天

子師傳多兼官況世子與考古所謂太傅者略近今
詹事之制而所謂少傅者則今少詹事之職也然則
今祭酒猶古之司成乎曰古者司成得教世子後世
齒冑禮廢而今之祭酒所教者僅國之俊造而已宜
其與古異矣前年 皇上命 東宮出閣講學文華

殿特 召歸德湯先生於江南命以禮部尙書管詹
事府事重德行也踰年蘇州翁先生亦自國子祭酒
擢爲少詹事先生表帥六館盡祛監中夙弊所條奏
諸教育法準於古制時議惜不盡用今而知 朝廷
之用先生其意良厚而其職則以古司成而行少傅

之事無以異也據今之職則先生之論說方有事耳
循古之制則審喻以太傅之德行而使湯先生之道
爲不孤者先生得無意與嗚呼自秦漢以來二帝三
王之遺迹盡矣今 聖天子獨稽古禮文肇舉盛典
擇人而畀之而先生適逢其會此予之所以親見之
而尤幸而尤樂其與湯先生相與以有成也

贈汪檢討出使琉球序

古天子行人所至止於五等封國而已自漢開西域
持節而馳者鑿空生事於萬里之外爲君子所不道
然猶未及於海外諸國也其後東南諸種類始稍稍

通貢中國而其中所謂琉球者隋大業間嘗發兵攻之終不能臣服至前朝始稟正朔奉職貢以及於

國家開創之際尤祇效臣節四十年間航海之費數至天子嘉其勤也復以其國俗好文學敦禮義不欲鄙夷其人乃妙選臣僚銜命往撫之於是禮官同諸大臣及科道官會推以翰林院檢討汪君充正使名上依故事賜一品服齎詔往前年汪君以文行超卓膺制科之選天下無不聞其名而慕之今將中朝之命臨賜絕島之國百靈效順趨走翼衛揚帆鼓棹直不十日可抵其境上則夫聆其聲名挹其言

論風采以帖服震讐竦然增上國之重者豈獨中山
君臣區區之是爲哉環島而居者小大國以十數將
必有聞風景附爭集闕下者使盛朝之崇德鴻業磅
礪無外汪君且與有力焉君行出自閩嶠乃者封疆
大吏鳴劒踴躍庶幾伏波橫海之功然舩艍之師銜
尾相屬回翔而不進者三年於茲矣或謂十萬之衆
不必賢於一使之任然其利害未可懸度也傳曰有
可以安國家利社稷者則專之言使之有遂事也以
君之才顧其勢不得以遂事比其歸也圖畫其所見
山川形勢設爲方略以上之以待謀國者之有所擇

而用焉此亦良使臣之職也

贈李編修出守臨江序

唐翰林院之設特以待諸供奉者其後設學士事寄
漸隆然歷代內外參用出入不常而爲州郡刺史者
類多鉅公碩儒所至樹名績後輒去爲大官其遺風
餘韻之在其地常歷久而不衰也與夫俗吏之剝精
疲神沈埋於案牘者異矣明初命編修以下考覈諸
司奏啟平允則列名封上欲其諳練世務也後永樂
四年以待詔解縉等七人入直文淵閣次年遂詔內
閣儒臣考滿勿改外任於是後之爲詞臣者以偃仰

養重爲自異於諸司累資積級不十餘年而至公卿
矣予覽明洪武後列朝實錄所載諸學士傳數厯清
華至老無一事實可紀就其間豈無卓犖奇偉如唐
宋諸公者而湮沒於無稱至不得比於州縣之末吏
猶有事功可以表見亦可惜矣夫養儒臣以儲公輔
之選也至問之決獄數不知問之錢穀不知異日何
以爲佐理天下之具乎此非有國者之利明矣 本
朝順治間嘗揀有才望儒臣外補方面其時大臣奉
行不稱或反用其所忌者充之遂至一出而不返而
成例卒不可變今 上二十七年八月吏部當大選

時知府缺多邊遠有力者巧爲營避詭託郎吏俸淺
不及數遂懸缺簽至二十有一積數月不掣言官屢
奏謂二千石民命所繫不宜久曠 上下其議部守
之益牢 上知其成見不可破遂以今十二月甲辰
奮然引見諸郎官益之以編檢俸深望重者三人親
填注各缺付所司刻期赴任勉以大用一時翕然稱
快頌 皇上識治體要明於知人而編修德州述修
李先生遂得臨江以去時先生當補少司成已咨部
數日矣旣得郡念太夫人在籍遠艱於就養恆憂見
於色予從先生館局久知其爲人沈深有器局慈惠

能利物厭飫經術不苟追隨有古名臣風其視治一郡直承蜩而掇之耳自平原具船由漕達江不兩月可抵治所欲避江行之險者取道武林上衢信沂流千里灘勢回曲澄波疊嶂夾岸深林茂樹文禽異石足以娛目爽神太夫人雖老健飯涉此不難昔司馬子長爲雋不疑傳詳書其尹京兆時受母誡錄囚徒多所平反卒以此名重朝廷而其母亦聲施至今予雅聞太夫人賢佐先僉事公厯任有聲先生素被教迎養以往待其政成還朝將必有操筆而書之如子長者豈不亦母子俱榮哉孰與夫前代之湮沒於無

稱者先生其亦幸而得遇其時也又何戚戚於中耶

贈永樂寺僧序

從弟友棠讀書邑西龍山之永樂寺至京師數爲予
言寺中之勝嘗賦十詠以志之予因是每思從南歸
之暇得杖策其間以覽其所爲十詠之勝者比還里
麤料理人事三四月間無停晷少間復謀北上將懼
不果游而寺中住持月潭上人予族叔祖也來訪予
且言曰寺創於宋淳佑中迄今殆五百年其間廢而
興興而復廢者屢矣今從燼餘初復之後殿宇宏敞
齋廊靚飭鐘魚梵誦之音交出於林樾而足以聳遠

近之觀聽者皆吾師德聚之力也師自十九薙落來
山中清齋蔬布修行勤苦數十年如一日而今僧臘
七十有一且老矣竊念此寺尊宿在明洪武間有西
曙禪師以博學召理典籍歸新寺宇僧寮至三百間
田畝十倍之飯僧如田之數宋學士景濂贈之以詩
戴九靈避地山中爲二蘭軒記先是柳道傳與僧正
宗契厚栖止於寺之水竹居其爲上福龍山記猶存
集中也至今寺產蕩析大半住僧纔二十餘人所謂
水竹居者雖故址不可復識然諸道人名字得不與
兵燹之劫灰俱燼而猶傳播於人口者徒以數公之

文字足留之也吾受師恩慮無以爲報私謂惟託於
文字足以垂之久遠而西曙正宗之間後有以位置
吾師者非吾子之文其誰屬與予雖恨未得一從寺
中游而猶樂道師之賢且以寺之故事不可以無紀
也於是乎有贈

送王少詹使祀南海神廟序

嶽鎮海濱之有定祀皆本於唐開元禮百川之水惟
海爲大而南海居委輸之極從廣州城南受三江之
水分東西二道東南直抵甌閩西南抵駱越以及東
西洋以往諸國無所不到於四海之中號爲尤大稱

天池焉故祀典獨重南海而韓退之作廟碑亦云南

海神次最貴者以此也

海神唐稱廣利王宋加號洪聖明洪武三年詔嶽鎮海瀆

皆去封號稱神

今制因之

在周頌般之樂章序謂巡狩祭四嶽

河海而作則巡狩之祀海其來久矣今康熙二十三

年削平巨孽中外無事 皇帝將以時巡天下爰考

古禮分遣諸朝臣告事山川而以詹事府少詹阮亨

王公往南海惟 國家撫有疆宇大海之中鯨呿鰲

擲憑妖鼓怒於波濤之內山河爲之簸掀日月爲之

運墮如是者幾四十年一旦風恬浪霽纖塵不驚依

嶴之國占風而至瀕海百姓含哺嬉游使吾 皇之

德化洋溢無垠神之功亦偉矣南海之神旣大而靈
以默佑我國家其功尤偉天子特以使事付公
豈無意哉案廣州志廟在州城南八十里本非島嶼
而陸行山徑崎嶇不若一帆之便退之於刺史孔戣
之親祀至誇爲僅事亦以往時刺史怠職不虔委事
於副而戣獨能稍自異於前政爲可述耳今天子
旣下南巡之詔獨嶺南地以僻遠不得至度公之
往布宣上德諭所以憂民疾苦之意至備吾知五嶺
荒徼俚人蠻戶必將如望屬車之清塵趨走恐後者
民氣歡悅神嗜飲食由是言之則海南萬里清晏呈